

3 He aha taku mahi? Raparapaina taku aramahi

Rauemi kaiārahi: He ngohe mō te raparapa i taku aramahi

Aramahi 1

Whakaahuatanga

Me whai pūkenga tūora nunui te tangata e whai ana i tēnei aramahi. Te pai kē o tana whakamahi i ngā rākau o Tū, kei a ia anō hoki ngā pūkenga whakatau tika i ngā ahunga i roto i te wao ururua mō ngā wā roa. He waiwai tēnei aramahi ki te oranga o ō tūpuna, ka mutu, nā te whakamahinga o aua pūkenga taea ai e ō tūpuna te rapu kai puta noa i te whenua.

Ko tēhea aramahi tupuna ko tēnei?

Whakautu – Kaiaru
(Ringa raupā/mātātoa)

Pātai tautoko

Homai kia toru ngā mea ka rerekē i te wā i ō tūpuna ina aru kīrehe te tangata i ēnei rā.

Ngā māramatanga aramahi matua

Kuneroa ai ngā aramahi i roto i te wā.

Ngā tuhipoka matapaki a te kaiārahi

Panoni ai ngā aramahi i roto i te wā. He tino rerekē ngā momo mahi i te wā i ō tātou koroua, kuia hoki i ērā o nāiane. Me urutau ō tātou pūkenga ki ngā ara hou o te mahi i ngā mahi. Hei tauira, ina aru kīrehe ka whakamahia pea te pūrere GPS, he waka whakahuri wīra e whā, me te mau hāketē tae pūaho. Karekau ērā mea i te wā i ō tātou tūpuna.

- He aha ētahi atu tauira o te kuneroa o ngā aramahi?
- He aha ngā momo mahi i ō tūpuna?
- Me pēhea te mahi i aua mahi i ēnei rā?

Whakaaturia te kuneroa o ngā aramahi ki te rangatahi.

- Ngā whakaaro aramahi kaupapa Māori

3 He aha taku mahi? Raparapaina taku aramahi

Rauemi kaiārahi: He ngohe mō te raparapa i taku aramahi

Aramahi 2

Whakaahuatanga

Ko te tangata nōna tēnei tūnga he tangata kī i te mātauranga whaitake me te pai o te māramatanga ki te whakapapa. He mana tōna i waenga i tōna iwi, ka taea hoki te whakatau kūrururu ki ngā hapū me ngā iwi e noho pātata ana. Kei te nuinga ake o te mahi, o te hautoa, i te para rānei i te pakanga, ko te nuinga ake o te whakaute ka whiwhi mōna anō, engari i tua atu, mō tōna hapū, iwi anō hoki.

Ko tēhea aramahi tupuna ko tēnei?

Whakautu – Kaihautū
(Toitoi manawa/kiriawe)

Pātai tautoko

- He aha ngā āhuratanga o te tauira pai?
- Whakaingotia he tauira pai me te kōrero mai i ngā kōunga, ki tō whakaaro, kei a ia.

Ngā māramatanga aramahi matua

Rapuhia ai ētahi kōunga tauwhāiti i ngā wāhi mahi.

Ngā tuhipoka matapaki a te kaiārahi

Ko tēnei mea te kōunga he āhuratanga tauwhāiti e whakaatu ana te tangata. Whakaahuatia ai hei wāhanga o te āhua o tētahi tangata, hei tauira, te atawhai, te noho haepapa, te pono, te matatika, te matakui. Kitea ai ō tātou anō kōunga e ētahi tangata mā ā tātou mahi, hei tauira, mēnā tae ai te tangata ki te mahi i te wā tika i ngā wā katoa, tēnā ka whakaahuatia pea ia hei tangata ū ki te haora i whakaritea, he tangata pono rānei.

- He aha ngā kōunga e kimi nā koe i tētahi hoa? i tētahi kaiako? i tētahi hoamahi?
- He aha āna mahi e whakaatu ana kei a ia aua kōunga
- Ko tō whakaaro, he aha ngā kōunga e kimi ana te kaitukumahi?

3 He aha taku mahi? Raparapaina taku aramahi

Rauemi kaiārahi: He ngohe mō te raparapa i taku aramahi

Aramahi 3

Whakaahuatanga

I runga noa atu o tūpuna hei kaihōpara, ka mutu, he inati ngā tawhiti i haerehia e rātou. Kia pērā ai, me noho rawa i waenga i a rātou ngā tāngata me ērā pūkenga hei āwhina kia tae pai ki te ūnga. I roto i aua pūkenga ko te māramatanga o ngā tai, te mōhio ki ngā taunga o te rā, te marama me ngā whetū. Whakarato mōhiohio anō ai ngā momo manu, ika hoki huri noa i tō rātou haerenga mō te ahunga me whai.

Ko tēhea aramahi tupuna ko tēnei?

Whakautu – Kaiwhakatere

(Ngākau pūmahara/tangata pukumahara)

Pātai tautoko

Homai kia toru ngā wero i pā pea ki o tūpuna i tō rātou haerenga, ā, i aha pea rātou ki te turaki i aua wero.

Ngā māramatanga aramahi matua

He wero kei ngā huarahi aramahi katoa.

Ngā tuhipoka matapaki a te kaiārahi

He wāhanga ngā wero o te ora, me te aha ka tūpono puta he wero i tō huarahi aramahi. He maha ngā uauatanga i pā ki o tūpuna pērā i te huarere kino, te takerehāia, me te kore kai. Kāore e kore i matapaetia ētahi uauatanga, engari kua puta ohore ētahi atu. Ahakoa ērā, ka pūmau tonu kia ū pai ai.

- He aha o piropiro ina tūpono puta he wero?
- He aha ngā kounga e hiahiatia ana ki te turaki wero? (hautoa, manawaroa, whakapono, pūkeke, tūmanako)
- He aha ka āwhina i a koe ki te turaki wero?

3 He aha taku mahi? Raparapaina taku aramahi

Rauemi kaiārahi: He ngohe mō te raparapa i taku aramahi

Aramahi 4

Whakaahuatanga

I hiahia ō tūpuna ki te whakarite ka maumahara tonutia ngā wā hira i te hītori kia mōhiotia ai aua mahi hira me ērā i whai wāhi, e ngā reanga i whai mai.

Ko tētahi ara e rangona tonutia ai aua karere i roto i te wā ko te tito waiata. Ka kīia e tātou nei te tangata tito waiata he aha?

Ko tēhea aramahi tupuna ko tēnei?

Whakautu – Kaitito

(Ringa rehe/kaiauaha)

Pātai tautoko

Ki tō whakaaro, he aha i hira ai te tohu wā hira i te hītori ki ō tūpuna?

Ngā māramatanga aramahi matua

Whai whakaarohia te whaihua o te aramahi ki ngā reanga e heke mai nei.

Ngā tuhipoka matapaki a te kaiārahi

He riterite tonu te whakaaroaro o ō tūpuna ki te whakatupuranga e whai ake ana, ina rā nā te tukunga iho o ngā mōhiotanga me te kōrero mō ā rātou mahi i roto i te waiata, te whakairo me te pūrākau. Whai whakaarohia te aweawenga o tō aramahi ki ētahi atu, me tērā e hiahia nā koe ki te tāpiri ki te ao mā tōu anō aramahi.

Tērā pea mā te whakamahi i ōu anō pūkenga ki te āwhina i tō whānau, tō iwi rānei, mā te whaitake rānei o ō mahi whakarite kia haumarua tonu te taiao hei hākinakinatanga mā ērā kei te whai ake. Waihoki, he ahurei te ahurea me te reo Māori ki tēnei whenua, ki te ao anō hoki, ā, he whakarerenga iho ki a koe, ki te iwi whānui hoki.

Ka hiahia pea koe kia whai wāhi te reo Māori me te ahurea Māori ki tōu anō huarahi aramahi.

- Ki a koe, ko wai tētahi i whaitake ana mahi i te roanga atu o tana aramahi?
- He waiwai, he hira rānei, ki tō whakaaro, ki te whai whakaaro ki ngā āhua e tautokona ai, e āwhinatia ai ētahi atu mā tō aramahi?
- He āhuatanga hira te reo me te ahurea Māori o tō haerenga aramahi i tēnei wā tonu?

3 He aha taku mahi? Raparapaina taku aramahi

Rauemi kaiārahi: He ngohe mō te raparapa i taku aramahi

Aramahi 5

Whakaahuatanga

I te ao o neherā whāia ai tēnei aramahi e te tohunga, e te mātanga rānei. Whakaakona ai e te tohunga ngā ākonga kua āta tipakona. Ko ērā ākonga katoa i taetae atu ki ēnei kura i āta tiro tiro mārōtia. Nā te kupu ā-waha a te tohunga te whakaako, ā, me maumahara te ākonga ki ia kupu ka tika.

Ko tēhea aramahi tupuna ko tēnei?

Whakautu – Kaiako
(Whakaruruhau/kaiāwhina)

Pātai tautoko

Ina whakaaro ki tētahi aramahi he mea hira kia whakaarohia te arotau o te mahi ki ōu anō uara. Ki te hiahia koe ki tētahi aramahi e whakaako ai, e tautoko ai i ētahi atu, he aha ētahi o ngā uara me whai koe?

Ngā māramatanga aramahi matua

Kōwhiria ngā huarahi aramahi e hāngai ana ki ō uara.

Ngā tuhipoka matapaki a te kaiārahi

Ko ngā uara ō tātou anō whakapono ā-whatumanawa mō te oranga, mō ngā āhua, ko te tikanga, e mahia ai ngā mahi. Ina takahia ō tātou uara e ā tātou anō mahi, ko te manawarau pea te hua. He nui ake te hira o ētahi uara ki ētahi tāngata i ētahi atu.

He wā anō kāore tātou e āta mōhio ki ō tātou anō uara kia pāngia rā anō e tētahi āhuatanga uaua.

- He aha ētahi uara e hira ana ki a koe?
- Ki tō whakaaro, he aha ngā uara o tō whānau, o ō hoa rānei? Kei te aweawea koe e ō rātou uara?
- He aha ētahi momo aramahi e hāngai ana ki ōu uara?

Whakaaturia ētahi aramahi ki ngā rangatahi tērā pea ka hāngai ki ō rātou uara.

- Ngā whakaaro aramahi kaupapa Māori

3 He aha taku mahi? Raparapaina taku aramahi

Rauemi kaiārahi: He ngohe mō te raparapa i taku aramahi

Aramahi 6

Whakaahuatanga

Ko te tikanga noa, kitea ai te harakeke hei rawa māori whakamahia ai ki te raranga kete me te putiputi. Heoi, he hira anō te harakeke ki ō tūpuna mō te hia pūtake, taea noatia te pare i a rātou i te riri o Tāwhirimātea. Whakamahi ai ō tūpuna i te muka pakaua mai i te harakeke hei hanga pōtae, koti ua me ngā hū. Mō te whai i tēnei aramahi me tino manawanui te tangata, me matatau ki te pāngarau, me āta whai i ngā hātepe mārama.

Ko tēhea aramahi tupuna ko tēnei?

Whakautu – Ringa raranga me te ringa whatu
(Pou whirinaki/kaiwhakahaere)

Pātai tautoko

He pūkenga whakawhitiwhiti ngā pūkenga e hiahia ana te kairaranga, ko tōna tikanga, ka taea te whakamahi i ngā āhuatanga kē.

Homai kia rua ngā mahi ka whakamahi i aua pūkenga, i aua kounga i tēnei rā.

Ngā māramatanga aramahi matua

Me mōhio ki ō pūkenga ka taea te whakawhitiwhiti.

Ngā tuhipoka matapaki a te kaiārahi

Ko te pūkenga tētahi āhua mahi kua ākona e te tangata, kei te whakaharataua hoki e ia, kia oti pai ai tētahi mahi. Ko ngā pūkenga whakawhiti ko ērā pūkenga ka taea te whakamahi i te whānuitanga o ngā tūāhuatanga rerekē.

Kei te tohu pea ngā pūkenga whakawhiti i tētahi momo mahi, tūmahi rānei e mahi ana te tangata. Kei roto pea ngā mea pēnei i te mōhio ki te whakatika raru, ki te whakahaere tangata, hui rānei, te mahi tahi ki ētahi atu, me te whakamutu tūmahi i te wā tika. E kore koe e mate ki te whai wheako mahi kia whai pūkenga ka taea te whakawhitiwhiti.

- He aha ōu momo pūkenga whakawhiti?
- Ka pēhea aua pūkenga koe e āwhina i tō haerenga aramahi?